

**Date – 15/08/2025**  
**Time - 10:40 -10:50Hrs**  
**AKASHVANI AIZAWL**

**REGIONAL NEWS BULLETIN**

**HEADLINES (MORNING)**

1. **India ramin zalenna a hmuh Independence Day vawi 79-na chu vawiin hi a ni a, tukin atang khan lawm niin Larsap Genreal (Rtd) Vijay Kumar Singh chuan, India ram zalenna ni pual hian Mizo mipuite chibai a buk.**
2. **India sipai captain Lalrinawma Sailo chu India rama sipai huaisen leh hna thawk tha chawimawina sang Kirti Chakra Award dawng tura thlan a ni.**
3. **Mizoram chakkhai lakluhna kawngchhia avangin Lungleiah pawh dawr bungrua, chakkhai leh Insakna bungrua hrang hrang te a la vang chho zel.**
4. **President Droupadi Murmu chuan Independence Day pualin ram leh hnam tan a thawktu hnam sipai te chawimawina chi hrang hrang Armed Forces leh Central Armed Forces te hnenah Gallantry award 127 leh Distinguished Sevice award 40 pek a nih tur thu a puang.**

<><><>

**I DAY**

**India ramin zalenna a hmuh Independence Day vawi 79-na chu vawiin hi a ni a, tukin atang khan lawm niin Larsap General (Rtd) Vijay Kumar Singh chuan, India ram zalenna ni pual hian Mizo mipuite chibai a buk a, thalaite chu ram leh hnam tana tha thawhtu ni turin a chah.**

**Tukin dar 7:00 khan Akashvani Aizawl chuan an hmunpui Tuikhuahtlangah Independence Day 2025 hi an lawm a, India hnam hla 'Jana Gana Mana' ngaihthlak a ni a.**

**Cluster Head Pu DR Lalropuia chuan India zalenna atan lu chhum ban chhum huam tute hre rengin, All India Radio hna thawktute pawh theihtawpa hna thawk a, hmasawn turin a chah.**

**Mizorama lawmna pui ber chu Sipai Lammualah hman mek a ni a. He hunah hian Chief Minister Pu Lalduhoma chu khuallian a niin Hnam Puanzar pawtparhin Parade Contingent te a endik a, an chibai bukrate chhanglethin March Past neih zui a ni.**



## **IDAY**

Vawiin hi Independence Day vawi 79-na a ni a, Prime Minister Narendra Modi chuan Red Fort, Delhi-a hun hmanah thu sawiin, Independence Day chu zalenna kutpui a nih thu a sawi.

Pu Narendra Modi chuan, India chuan ram leh hnam humhim nan theihtawp a chhuah tih a sawi a, pawn lam atanga tih chhiat tuma beitu hmelma te chu an beisei leh rin phak baka chhanletna an pek zel thu sawiin, Operation Sindoor chuan mipuite thinurna a lantir tih a sawi bawk.

Prime Minister Narendra Modi chuan, kum 2024 a lo thlen hunah chuan India chu ramchang kang a ni theih nan 'Viksit Bharat' hnuaiyah nasa taka hmalak a ni tih a sawi a, ram zalenna kum 100 a tlin hunah chuan kawng hrang hrangah ram chang kang leh intodelh a nih theih a beisei bawk a ni.

Kumin Independence Day thupui atan hian 'Naya Bharat' hman a ni.



## **KIRTI CHAKRA AWARD**

India sipai captain Lalrinawma Sailo chu chu India rama sipai huaisen leh hna thawk tha chawimawina sang Kirti Chakra Award dawng tura thlan a ni.

Aizawl Chanmari Veng mi Lalrinawma Sailo hian vawiina Independence Day lawmnaah chawimawina hi a dawng dawn a, 4 Para (Special Forces)-a awm niin chawimawina a dawn tur hi India rama Peacetime Gallantry Award sang ber pahnihna (Second Highest Peacetime Gallantry Award) a ni.

Chief Minister Pu Lalduhoma chuan social media kaltingin lawmpuina thu a sawi a, India rama Peacetime Gallantry Award sang pahnihna Kirti Chakra (Wheel of Glory) dawngtu Capt Lalrinawma Sailo chu a lawmpuina a chhuang hle tih a sawi a, he chawimawina sang tak a dawng hian Mizo thalaite theihna ropuizia a tarlang nia sawiin, theihtawp an chhuahna apiangah mi chungah leng thei an ni tih a zirtir a ti a, a kal zelna turah duhsakna a hlan.

Home Minister Pu K. Sapdanga leh Sports Minister Pu Lalnghinglova Hmar te pawhin captain Lalrinawma Sailo an lawmpuina thu tarlangin, India ram huap chawimawina sang dawng thei Mizo tlangval chu an chhuan bakah duhsakna an hlan thu an sawi ve bawk a ni.



## **SUPPLY**

Mizoram chakkhai lakluhna kawngchhia avangin Lungleiah pawh dawr bungrua, chakkhai leh Insakna bungrua hrang hrang te a la vang chho zel.

Lunglei a dawr lian ber te zing ami, MIZOFED-ah chuan Buhfai bag Arham tih loh chu neih vak a lawi an nei tawh lo. MIZOFED dawr hian tun dinhmunah Tel tlem an nei a, an neih chhun chu a theih anga semrualin Case khat te te ten an hralh. Dal bag an nei tawh lova, reasdy made dal an tih,

Masoor Dal tlem an nei a, chini an nei lova, chi leh thil dang neuh neuh chu tam vak lo an nei rih. Bawngnute atanga siam, Amul Gold leh thil dang an nei lo bawk.

Lungeliah hian Insakna bungrua, a bikin cement lei tur a awm lova, Insa lai engemawzat an chawl. Hetihlai hian tuialhthei erawh harsatna lutuk a awm rih lo.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

STUDENT FELICITATION

Champhai South bialtu MLA Lt. Col. Clement Lalhmingthanga chuan a bial chhunga zirlai post graduate a titha te chawimawina thilpek a hlan.

Circuit House Conference Hall, Bethel Veng Champhaia hun hmanah, Pu Lalhmingthanga chuan Thalai te tan ZPM Sawrkarin theihtawp a chhuah thu sawi in, Agriculture lama hmasawna leh thalai tam zawk te Central Service ni thei tura nasa leh zuala an in buatsaih a ngai a ni, a ti. Central Service-ah hna ruak a tam em em a, chung hna te chu State dang chan tur a nih bik loh zia leh tuna zirlai mi tha tak tak te hian intuai hriama theihtawp kan chhuah chuan Kan hlawhtling thei a ni tih a sawi.

Lalhmingthanga chuan sawi chhunzawmin Central Service tih hian IAS, IFS leh IPS an lo tling lo a nih pawhin, a tlukupi hna tha tak tak thawh tur a tam a ni a ti a. Lehkha zirsang thei lo te tanah leh kan ram kawng engkimah venhim leh hma a lo sawn theihna turin, Chief Minister kaihhruaina hnuaiah Mizo te tan, Mizoram-a thawk turin Territorial Army Batallion din a ni dawn a. Hengte hian hmasawna tam tak min pen pui dawn a ni, a ti bawk.

<><><>

PRESIDENT

President Droupadi Murmu chuan Independence Day pualin ram leh hnam tan a thawktu hnam sipai te chawimawina chi hrang hrang Armed Forces leh Central Armed Forces te hnen ah Gallantry award 127 leh Distinguished Sevice award 40 pek a nih tur thu a puang.

Chawimawina pek turte hi kirti chakra 4, Vir chakra 15, shaurya chakra 16, Bar to Sena Medal 2, Sena Medal 58, Nao Sena Medal 6, Vayu Sena Medal 26, Sarvottam Yudh Seva Medal 7 leh Uttam UmYudh Seva Medal 9 leh Yudh Seva Medal 24 a tel bawk.

<><><>